

『日本文德天皇實錄』2 嘉祥三年十一月己卯条

己卯。從四位下治部大輔興世朝臣書主卒。書主右京人也。本姓吉田連。其先出自百濟。祖正五位上圖書頭兼內藥正相摸介吉田連宜。父內藥正正五位下古麻呂。並爲侍醫。累代供奉。宜尋兼長儒道。門徒有錄。書主爲人恭謹。容止可觀。昔者 嗟峨太(大)上天皇在藩之時。殊憐其進退。延曆廿五年爲尾張少目。大同四年四月爲縫殿少允。弘仁元年正月遷爲內匠少允。四年五月遷爲左兵衛權大尉。七年二月轉爲左衛門大尉。兼行檢非違使事。有頃遷爲右近衛將監。書主雖長儒門。身稍輕捷。超躍高岸。浮渡深水。猶同武藝之士。能彈和琴。仍爲大歌所別當。常供奉節會。新羅人沙良眞熊。善彈新羅琴。書主相隨傳習。遂得秘道。弘仁八年正月叙外從五位下。拜織部正。九年正月爲和泉守。治聲頗聞。十二年正月叙從五位下。十四年正月叙從五位上。爲備前守。是時和泉罷任未歸。京師便道之任。政化清平。天長四年還爲左京亮。五年二月拜筑後守。因身病困。確辭不行。八年二月更爲左京亮。承和四年上請。改姓爲興世朝臣。七年正月爲信濃守。九年正月叙正五位下。十二年拜木工頭。十四年正月叙從四位下。嘉祥三年八月遷爲治部大輔。以年老身衰。聊披山林之地。常發觀念之業。卒時年七十三。